

NO. SOALAN : 15

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

DARIPADA : DATUK MADIUS TANGAU [TUARAN]

TARIKH : 17 MAC 2015

RUJUKAN : 7700

SOALAN:

Datuk Madius Tangau [Tuaran] minta **MENTERI DALAM NEGERI** menyatakan adakah Laporan RCI Mengenai Pendatang Asing Tanpa Izin di Sabah telah membantu memperjelaskan faktor-faktor kenapa pertumbuhan penduduk Sabah yang sangat luar biasa sepanjang dekad 80-an dan 90-an, jika ya, apakah penjelasan tentang penyebab utama pertumbuhan penduduk yang luar biasa tersebut.

JAWAPAN :

Tuan Yang di-Pertua,

Seperti mana yang dimaklumi, salah satu Terma Rujukan Suruhanjaya Siasatan Pendatang Asing di Sabah adalah untuk menyiasat sebab-sebab peningkatan populasi di Sabah berdasarkan beberapa kategori seperti warga Sabah yang menetap di Sabah, pekerja asing termasuk ahli keluarga, pendatang asing tanpa izin termasuk keluarga dan pelarian.

Kementerian ini juga mengambil maklum akan laporan Suruhanjaya Siasatan yang di antaranya turut memperjelaskan faktor-faktor yang menyumbang kepada peningkatan penduduk di negeri Sabah seperti berikut:-

- i. seperti penghijrahan peringkat pertama pendatang awal ke Sabah dari Pulau Sulu bermula pada lewat abad ke-15 lagi iaitu sebelum kedatangan orang Sepanyol ke Filipina di mana wujud bentuk politik yang koheren dan pertalian budaya antara pelbagai kumpulan etnik yang menetap di Sabah, Filipina dan Indonesia;
- ii. Suruhanjaya juga mendapati faktor utama yang menyumbang kepada kemasukan pendatang asing tanpa izin yang ramai ke Sabah ialah motivasi ekonomi kerana terdapatnya pengangguran besar-besaran di Selatan Filipina dan Indonesia mulai tahun 1978;

- 21
- iii. Pengaliran pendatang asing dari Filipina dan Indonesia kerana kedudukan geografi, di mana Sabah mempunyai garisan pantai melebihi 1,700 km; dan
 - iv. Pemberontakan Mindanao pada tahun 1970an sebagai faktor penyumbang utama kemasukan pelarian yang ramai ke Sabah.

Tuan Yang di-Pertua,

Kerajaan memberikan perhatian yang serius terhadap pengurusan warga asing di Sabah dan akan menjadikan dapatan Suruhanjaya Siasatan sebagai panduan dan rujukan. Kerajaan juga ingin menumpukan segala perhatian ke hadapan (*way forward*) dalam menyelesaikan isu yang dibangkitkan ini melalui penubuhan Jawatankuasa Pengurusan Warga Asing di Sabah sepertimana yang telah diumumkan oleh Kerajaan pada 03 Disember 2014.